

2 Tximòtxi-ò

Paulo Inatxina Tyyriti Tximòtxi-ò

1 ¹Paulo jiarỹ rare. Jesuisi Kristu deòdu jiarỹ rare. Kia jiarỹ rare Deuxudeewireki wahe. Jesuisi Kristu juhuu rarybere, umy tỹmyra tuedeõna inydeereny kidiwahinykremy. Tii kia wedu rare. ²Kai Tximòtxi, wariòre waluunadu wesemy atximahâte. Kia tyyriti adee ariwahinykre. Wiòhedỹỹna, ruxetõena, ywina, Deuxu Inytyby-ribi, Jesuisi Kristu Inynyrỹ-ribi adee kedehemynykemy watzireri.

³Deuxumy reàlãreri iwese wahabohomy reàlãre wese. Wanohõti Deuxu-ò ywile jiarỹ rare. Aõu aõu adee, Tximòtxi, rexitõenymahãre. Txuõ txuõlemy, ruwana Deuxu-ò rexitõenymahãre. ⁴Iu rareu, arube-ribi wanohõti rosaõhyymyhỹre. Arora-ò arakemy watzimahãre, wadeysatyhymy ararekemy. ⁵Atyhydỹỹna-ribi wanohõti rosaõtyhy. Alahi, Lòide, juhuu rityhynymyhỹre. Idi adi, Eunisi, tule rityhynymyhỹre. Kai tule wiji tetyhynymyhỹte inihe. ⁶Kia dorihe itxi õhõti reijaranyreri. Wadebò tahe aratityre retidireu, arayky-ò Deuxu aõ riwahinyre awahisidỹỹna wesekremy. Wiji kia arayky woludu rõrõra wana biixixanyke. Kia dori Deuxu wahisidỹỹna rare. ⁷Deuxu-wana iny ruberuõtyhy. Tii dori inydee ruru riwahinyra, luuna riwahinyra, tule bedeerydỹỹna riwahinyra. ⁸Tule Deuxu rybemy rybe-ki ixỹruõlemy. Deuxu rybemy rybe-ki wamy maixỹruõtyhy. Deuxu rybemy rybe-ki tahe, rõtenawo-ò riwatidire. Kia tahe awire. Deuxu rybe wityhydỹỹna-ò aõhõkỹmy rokotỹỹnykre. Deuxu dori inydee ruru riwahinymyhỹre. ⁹Tii heka iny ritarenyre biu-ò hena riwahinyre wahe. Tai taaõmysdỹỹna inydee diwahinyde. Iny awirerimy rareki aõkõ inydee diwahinyde. Taruxetõenale-ki inydee diwahinyde ixideewireki. Juhu bedeu Jesuisi Kristu òraru-ki ruxetõena inydee diwahinyde. ¹⁰Kia ruxetõena wijile rehemynyra inydee. Jesuisi Kristu inyтарасadu kia diwyde. Tii rubunale riixãwididỹỹnyre. Biu-ò hena Rybewihikỹmy kia ritỹnynymy diwyde. ¹¹Riwatare tarybemy rybedumy. Rybedumy riwateõnyre, tule bedeerydỹỹdukemy riwateõnyre. ¹²Tai judeukõdu mahãdu òraru-ki aõhõkỹmy ratỹỹnymahãre.

Ihârele tahe raixỹruõlemahâre. Rexieryre dori tii retyhynymahâre. Reeryre dori tii ruu dire waaõmydỹnana tamy retidire iyrubudỹny kiatxu-ò. ¹³Waõbiti rybe biywinyke juhuu kia wamy taholate, ityhydỹna-di. Biywinyke luuna-wana. Jesuisi-ki tahe luuna tyhy rare. ¹⁴Timybo Deuxu adee diwahinyde, biyrubunyke. Deuxu Tytybytyhy dori inywo-ki ratxireri.

¹⁵Ibutumy kabede ludu Asia ludu riwarira. Fikelu ijõnre. Erimojini tahe ijõre. Kia tahe kai teeryte. ¹⁶Inynyrỹ ruxetõena kidiwahinykemy watxireri Onisiru sỹmahãdu-ò. Tii dori aõu aõu riwawidhenanyre areysakemy. Tiu riixỹrudỹnyõtyhyre wawomati reroti-di jiarỹ ranyreriki. ¹⁷Tai tahe Roma hãwãhãkỹ-ò ritehemynyreu, riwajehyyre; idi tawa-ki rahare. ¹⁸Iny Iòlò ruxetõena tamy kidiwahinykemy watxireri kia txuu. Efesu hãwã-ki dori Onisiru riwawidhenanytyhyre. Kia teeryte waratyremy.

2 ¹Kai tahe wariõre wese tate. Jesuisi Kristu lãhãna-ribi ruruna bitake. ²Aõbo wary-ribi taholatemy iny sõweko-ò relyyreu, kia ijõ iny õbiti-ò tuu belyyke. Iny rexihumy rarekoõle tuu belyyke. Idi tahe tiõboho inywitxira ribedeerynyrenyke. ³Waaõhõkỹmydỹnana wawana tuu botỹnyke. Jesuisi Kristu soldadowihikỹ-wesemy kai mabeke. ⁴Soldadoõ tadinodu aõmydỹnanale rityhynmyhỹre. Tii ixideewimy rarutaaõtyhy. ⁵Ijesudu ijesu ritake õbitimy resukekile. ⁶Oworuwidỹydule juhuu suribi bederaty ritamyhỹ. ⁷Aõmybo wiji raryberadi mohotinyke, raweseranyreki. Inyiòlò ibutumy araerynanyke. ⁸Jesuisi Kristu rubu-ribi ixixadu-txi õhõti reake. Ihetxiu Davi Jesuisi labiemy raremyhỹ, iwese inryrbewihikỹ rarybere wese. ⁹Rybe wihikỹmy relyyreki dori womati reroti-di rataamy aõhõkỹmy ratỹnyreri, aõbina widỹydu wesemy. Deuxu rybe tahe, inyõ ritaaõtyhy. ¹⁰Ibutumy reõludunymahãre ityhydỹydu mahãdu dee, Deuxuhõrõ dee. Kiaboho Jesuisi Kristu tarasanamy ritakemy idi watxireri. Tarasana, lãhãna aõu aõu ritakemy idi watxireri. ¹¹Rybe inatyhy rare. Jesuisi Kristu-wana iny rurukeki, irumy tii-wana aroireke. ¹²Inyboho rikityhynyhyrenykeki, tii-wana riòlõnyrenyke. Inyboho Jesuisi rikitxiõnyrenykeki. Tii tule iny ritxiõnyke. ¹³Iny rikityhynyõrenykeki, ihãrele tii ityhyhymy rarekre. Tii rexitxiõnyõtyhy.

¹⁴Iny nohõti kia-txi reakemy biwisỹnyke. Tamy marybeke ujõmohyyõmy rarekemy. Ujõmo tahe wiõhedỹna aõkõ rare. Ujõmo-ò ijohonadu urile ujõmodumy relekre. ¹⁵Kai tahe marurunyke Deuxudeewimy belekemy. Kai Deuxu deõdu tate. Kia rybe inatyhy-di õbitimy maraykynyke, idi tahe, bierynanyke. Tahe bexiixỹrudỹnyõtyhy. ¹⁶Rybe õweõwemy rybedu-ribi irehemy bexieke, rybebina-ribi tule. Kia rybedu urile raõrarunynihikỹmyhỹke. ¹⁷Kia erydỹna reurõmyhỹre yjy wese. Imineu, Filetu-wana kia wese rierydỹnanyre. Kia rybe inatyhy-ribi rexihitxinyre. ¹⁸Tii rarybemyhỹre: —Iny ixixana dorihe reara. Kia rybe-di ityhydỹyduõ wimy uriurile rityhynreri. ¹⁹Deuxu hõrõ tahe inatyhymy rỹirakre. Kia tahe urihixina rare:

—Deuxu tahõrõ mahãdu rierymyhỹre.

Ijõ tahe:

Inynyrÿ ijoimy iximy rybedu, òraruna heka riatykre.

²⁰Ityhy mahädu hetonihikÿwo-ki womati tÿrÿrÿhÿkÿhyna, pratahyna sohojile aõkõ rÿire. Òwòruhyna, suhyna tule rÿire. Hynaõ tahe rÿsÿnawihikÿ hyna rare. Ijõ tahe rÿnysi-di dehuna rare. ²¹Kia hyna wese iny rÿira. Ijõ rÿnysihyna wese rÿikeki, idi rexisuhokeki, rÿsÿnalralyra wesemy reurðke. Tawedu-ò awimy rÿike, tawedudeewimy. Tai tahe aõ wihikÿhynamy rexiwiny my rÿire. Kai tahe iwesele mabeke. ²²Kai ijo i tÿmyra tate, amahädu òraruna-ribi bexiemy; ixi-ribi aõ-di røhòtynreri, kia-ribi mahenyke. Òbitina, ityhyna, luuna, ywina-wana biheludunye. Deuxu-ò rexitðenye òbiti mahädu-wana. ²³Erysydÿÿna itxÿtemy wiribi rybeõmyke. Kiaribile ujõmo røhònymhÿre. ²⁴Deuxu deòdu raujõmonyõtyhy. Tii tahe iny ibutu dee ywimy risÿnymhÿre, erydÿÿnamy rexihumy ihÿmyhÿre. ²⁵Ywina-di riòbitynreri iny ixitxiòdÿÿna mahädu. Tii heka riraðreri Deuxu worahòresena tamy riwahinykemy. Idi tahe inatyhymy rierykemy. ²⁶Tule itxÿte-ribi røðsekemy, Satanasi reroti-ribi rexitakemy. Tai tahe Satanasi rimyrau tahe ritaataara teewimy riwinykemy.

3 ¹⁻²Bededÿÿnana konanamy bededÿÿnana sirahakÿ kÿnyikre. Kia tahe bieryke. Iny ixideewimy riwinykemy ixi-di ratxikre. Nieru tarasalem y ixi-di rexinohòtidÿÿnymhÿke. Rybetyhyhÿkÿlemy iximy rarybekemy ratxikre. Ixidee awihikÿlemy røhòtynkemy ratxikre. Rybebinalemy rarybemyhÿke. Tyby ise-wana riwinyõhyymhÿke. Inyõ-ò aõmy reälàõhyymhÿke. Òbitiry rityhynyõhyymhÿke. ³Iny-ò tuuna ihoõhyre. Inyõ ibiòwamy rareõtyhy. Aõbina binalemy inmy relymyhÿke. Rexiywinyõhyymhÿke. Reburehekÿ rariamhÿke. Òbitimyno ibinahymy rarekre. ⁴Iny deòsadÿÿdumy rarekre. Ixilunadumy rarekre. Ywimy aõkõ rarekre. Iwisÿdÿÿna luuhymy rarekre. Deuxu tahe tuuðkre. ⁵Òbitimy risÿnymhÿre wese tahe òbitiruru ritxiõnymhÿke. Kai, Tximòtxi, kia iny-ribi irehemy mabeke. ⁶Kia häbu tahe hetoõ-ò ralòmhyre. Häwyy uri uri rÿira xiwedeõ-ò òrarulÿxina-di ralòmhyre. Kia tawisÿdÿÿna-di riernanymhÿre tarybewiwidile, tahe häwyy rityhynymhÿre. ⁷Kia häwyy aõu aõu røerykemy ixidi røhòtynymhÿre, urile tahe inatyhyna tiu rieryõtyhy. ⁸Iwese ihetxiu Ijãni, Ijãbri-wana Moisesi òludumy rÿire wese. Wiji tule kia häbu inatyhyna òludumy rare. Irayky rawerynyre. Ityhydÿÿna-di dedsanamy rÿimyhÿre. ⁹Tiu tako-ò raõtyhy, iitxÿtereriki, kia iruina òraruna ibutumy iny rierykre, iwese Ijãni, Ijãbri òraruna ibutumy iny raeryre wese. ¹⁰Kai, tahe waerydÿÿna-ò taholahymahäte. Iwese raremahä wese tiwaheludunymahäte. Watyhyna teerymahäte, wadeybina, waywina, waluuna, waixiòlòdÿÿna. ¹¹Aõu aõu inybinahakÿ wadi riwisÿnyreri, tule aõhòkÿmy ratÿÿnyreri. Kia ibutumy teerymahäte. Kia wade rotÿÿnymy rÿire Atxiòkia häwã-ki, Ionio häwã-ki, tule Listra häwã-ki. Aõwitxira witxiramy aõhòkÿmy ratÿÿnymahäre. Wanyrÿ tahe ibutu-ribi riwatate. ¹²Inyõ òbitimy ratxikeki Jesuisi Kristu-ò, tii aõhòkÿmy rotÿÿnykre iòraru-ki. ¹³Häbu bina bina rabinahykemy rarekre, tule häbu inatyhy aõkõ rabinahykemy rarekre. Inyõ tiiboho riitxenanykre, tule tiiboho inyõ kidiitxenanykre. ¹⁴Kai tahe aõbo

teeryte, kia-di mohõtinyke aõbo tetyhynmahâte-di. Tahe tiribibo teeryte, õhõtikile idi mabekre. ¹⁵Uladuribile teeryte Deuxu Tyyriti. Kiadile bierykre Jesuisi Kristu tarasadÿÿna idi bimykremy. Kia adee kanake bityhynekekile kÿnyhe. ¹⁶Ibutumy Tyyritityhy Deuxu elewesenamy nade. Bedeerysyna urenana heka rare. Òrarudu õbitidÿÿna heka rare, ibutumy riõbitinykemy. Tule aõbo awihikÿmy raremy riernanykre. ¹⁷Deuxu deõdu dori õbitile rÿirakemy. Aõwiwihikÿ widÿÿna aõbo dori rexihulemy rÿirakemy.

4 ¹Deuxu, Jesuisi Kristu kiaru-ki arâteõnykre. Jesuisi Kristu dori rubu mahãdu iru mahãdu-wana wiribi rihitxinykre, tii taõlõna kaõ kidiwykre. ²Belyyke Deuxu rybemy, inydee awikeki, tule inydee awiõkeki. Ywina-di iny biõbitinyke. Iny biwiõhenanyke. ³Bedeÿÿnanabina kanakre. Kia txuu erydÿÿdu õbiti-õ roholaõhyyre. Erydÿÿdu ributunykre tamydeewimy. Iwese iny tõhõti nohõtijuty-õ rotÿnymyhÿre wese tamy wimy aõna aõnaõle roholamyhÿkre. ⁴Inatyhyerydÿÿna-õ roholaõhyymyhÿre. Urile ihetxiu ijyÿde roholakemy ixidi ihÿre. ⁵Kai tahe ywimy marayknyke. Ibutumy aõhõkÿmy botÿÿnyke. Deuxu Rybewihikÿmy belyyke kia tahe aõmysÿdÿÿnare Deuxu adee riwahinyre. Idi hylemy mabekre. ⁶Iny riwawahinyke xiwena wesemy rubu-õ. Waixituededÿÿnana heka rehemynreri. ⁷Ijesu wihikÿwesemy tahe rexijesudÿÿnyre wese. Rekonananyra heka waumy ijera. Retyhynyhyra tahe ityhyna. ⁸Õbitiwidÿÿna raheto wese wadee rexihumy roire. Wanyrÿ, ywisidÿÿdu õbiti, riwawahinykre kiatrixu. Jiarÿ sohojiõle aõkõ. Tahe tule irarõsõdu mahãdu-õ. Jesuisi dehemyynyna luumy kia mahãdu roimyhÿre. Tamy tule rataanaõ raheto wese riwahinykremy.

⁹Wylemy inihe waroramy manake. ¹⁰Dema riwarira Tesalonia hãwã-õ rara. Tii bede aõmydÿÿnana luure. Kalatxia bede-õ Kresetxi rara. Dalimasia bede-õ Txitu rara. ¹¹Luka-wanale watrixeri. Tahe kai Marku bididykre, wawiõhedÿÿdu wihikÿmy rarekemy. ¹²Txitxiõ heka Efesu-õ reteõnyre. ¹³Kai tahe manakreu warahana bidiwykre. Troaji hãwã-ki Karpu heto-ki tahe warahana rerire. Watyyriti tule bidiwyke tyriti welÿte tule nohõti losaõtyhymy. ¹⁴Alexÿdre womati loresedÿÿdure warybe dibinanymyhÿde. Wanyrÿ iõwydÿÿna tamy kidilidikre riwabinanyreki. ¹⁵Kai bexiekre kowa-ribi, inyrybe dori rityhynyõhyymyhÿre. ¹⁶Juhuu dinodu-õ rewyõnyreu inyõ riwawiõhenanyõhyyre. Ibutumy rirahure waribi. Aõbo wabinamy riwinyre-ribi Deuxu tõhõti rosamy watrixeri. ¹⁷Wanyrÿ tahe, riwawiõhenanyra Deuxu rybemy rybe-ki. Iny wixira dori, judeukõdu mahãdu roholamyhÿre. Leaõry-õ, wadi rehukõra. ¹⁸Wanyrÿ tule riwatakre ibutumy aõmydÿÿnana bina bina-ribi. Kowa bede wihikÿ-õ riwadykre. Tuu rekealãkre aõu aõu bededÿÿnana roobymy. Kie.

¹⁹Warybe wehityyna Prisila-õ, Akila-õ biõkre tule Onisiru sÿ mahãdu-õ. ²⁰Erasto, Oritxi hãwã-ki rarire. Trofimo, Miletu hãwã-ki binamy resere. Taile heka rarira ibinamyhÿreki. ²¹Wylemy manake inihe beðrako-ki. Ubulu tarybewehityyna adee riwahinyre. Tu Prudente,

Lino, Laujia ijõre. Tule ibutumy ityhydỹduseriõre rybe wehityyna adee riwahinyreri.

²²Wanyrỹ awana ratxikemy watxiwãhãre. Tule làhàna umy-wana ratxikemy watximahãre. Kie. Paulo